

सिरि उसहदेव सामिस्स णमो । सिरि गोडी - जिराउला - सव्वोदयपासणाहाणं णमो । नमोऽत्थुणं समणस्स भगवओ महइ महावीर वद्धमाण सामिस्स । सिरि गोयम - सोहम्माइ सव्व गणहराणं णमो । सिरि सुगुरु - देवाणं णमो । **वहिदसाणं बारसमं उवंगं पढमं अज्झयणं-निसडे ☆☆☆ १)** जइ णं भंते समणेणं भगवया महावीरेणं जाव संपत्तेणं उवंगाणं चउत्थस्स वग्गस्स पुप्फचूलियाणं अयमट्ठे पन्नत्ते पंचमस्स णं भंते वग्गस्स उवंगाणं वहिदसाणं ० दुवालस अज्झयणा पन्नत्ता तं जहा - ११-११ - (३०-१) २) निसडे मायणि-वह-वहे पगया जुत्ती दसरहे दढरहे य महाधणू सत्तधणू दसधणू नामे सयधणू य ॥१॥ (॥५॥) ३) जइ णं भंते समणेणं भगवया महावीरेणं जाव संपत्तेणं उवंगाणं पंचमस्स वग्गसस्स वहिदसाणं दुवालस अज्झयणा पन्नत्ता पढमस्स णं भंते उक्खेवओ ० एवं खलु जंबू तेणं कालेणं तेणं समएणं बारवई नामं नयरी होत्था-दुवालस-जोयणायामा नवजोयणवित्थिण्णा जाव पच्चक्खं देवलोयभूया पासादीया दरिस-णिज्जा अभिरुवा पडिरुवा तीसे णं बारवईए नयरीए बहिया उत्तरपुरत्थिमे दिसीभाए एत्थ णं रेवतए नामं पव्वए होत्था-तुंगे गगणतलमणुलिहंतसिहरे नाणाविहरुक्ख-गुच्छ-गुम्म-लया-वल्ली-परिगया-भिरामे हंस-मिय-मयूर-कोंच-सारस-चक्कवाग-मदणसाला-कोइलकुलोववेए तड-कडग-विवर-उज्झर-पवात-पब्भारसिहरपउरे अच्छरण-देव-संघ-विज्जाहरमिहुणसंनिचित्ते निच्चच्छणए दसार-वर-वीरपुरिस-तेल्लोक्कबलवगाणं सोमे सुभए पियदंसणे सुरुवे पासादीए जाव पडिरुवे तस्स णं रेवयगस्स पव्वयस्स अदूरसामंते एत्थ णं नंदनवने नामं उज्जाणे होत्था-सव्वोउय पुप्फ जाव पडिरुवे तत्थ णं नंदनवने उज्जाणे सुरप्पिए नामं जक्खस्स जक्खाययणे होत्था-चिराईए जाव बहुजणो आगम्म अच्चेइ सुरप्पियं जक्खाययणं से णं सुरप्पिए जक्खाययणे एगेणं महया वनसंडेणं सव्वओ संमता संपरिक्खित्ते जहा पुन्नभदे जाव पुढविसिल्लावट्टए तत्थ णं बारवईए कण्हे नामं वासुदेवे राया होत्था जाव रज्जं पसासेमाणे विहरइ से णं तत्थ समुद्विजयपामोक्खाणं दसण्हंदसाराणं बलदेवपामोक्खाणं पंचण्हंमहावीराणं उग्गसेणपामोक्खाणं सोलसण्हंराईसाहस्सीणं पज्जुणपामोक्खाणं पंचण्हंमहावीराणं उग्गसेणपामोक्खाणं सोलसण्हंराईसाहस्सीणं पज्जुणपामोक्खाणं अब्हुट्ठाणं कुमारकोडीणं संबपामोक्खाणं सट्ठीएदुहंतसाहस्सीणं वीरसेणपामोक्खाणं एक्कवीसाएवीरसाहस्सीणं रुप्पिणिपामोक्खाणं सोलसण्हंदेवीसाहस्सीणं अणंगसेणापामोक्खाणं गणिया-साहस्सीणं अण्णेसिं च बहूणं राईसर ० वेयड्ढगिरिसागरमेरागस्स दाहिणड्ढभरहस्स आहेवच्चं जाव विहरइ तत्थ णं बारवईए नयरीए बलदेवे नामं राया होत्था-महयाहिमवंत-महंत-मलय-महिंदसारे जाव रज्जं पसासेमाणे विहरइ तस्स णं बलदेवस्स रण्णो रेवई नामं देवी होत्था-सूमालपाणिपाया जाव विहरइ तए णं सा रेवई देवी अन्नया कयाइ तंसि तारसगंसि सयणिज्जंसि जाव सीहं सुमिणे पासित्ता णं पुडिबुद्धा एवं सुमिणदंसणपरिकहणं कलाओ जहा महाबलस्स पन्नासओ दाओ पन्नासं रायवरकण्णगाणं एगदिवसेणं पाणिग्गहणं नवरं-निसडे नामं जाव उप्पिं पासाए विहरए तेणं कालेणं तेणं समएणं अरहा अरिट्ठनेमी आइगरे दसधणूइं वण्णओ जाव समोसरिए परिसा निग्गया तए णं से कण्हे वासुदेवे इमीसे कहाए लद्धट्ठे समाणे हट्टुट्ठे कोडुंबियपुरिसं सदावेइ सदावेत्ता एवं वयासी-खिप्पामेव भो देवाणुप्पिया सभाए सुहम्माए सामुदाणियं भेरिं तालेहिं तए णं से कोडुंबियपुरिसे जाव वयणं पडिसुणित्ता जेणेव सभाए सुहम्माए सामुदाणिया भेरी तेणेव उवागच्छइ उवागच्छित्ता सामुदाणियं भेरिं महया-महया सद्देणं तालेइ तए णं तीसे सामुदाणियाए भेरीए महया-महया सद्देणं तालियाए समाणीए समुद्विजयपामोक्खा दस दसारा देवीओ भाणियव्वाओ जाव अणंगेणापामोक्खा अणेगा गणियासहस्सा अण्णे य बहवे राईसर जाव सत्थवाहप्पभिइओ ण्हाया ० पायच्छित्ता-सव्वालंकारविभूसिया जहाविभवइड्ढीसक्कारसमुद्वएणं अप्पेगइया हयगया जाव पुरिसवग्गरापरिक्खित्ता जेणेव कण्हे वासुदेवे तेणेव उवागच्छंति जाव वद्धावेति तए णं से खण्हे वासुदेवे कोडुंबियपुरिसे एवं वयासी-खिप्पामेव भो देवाणुप्पिया आभिसेक्कहत्थिं कप्पेह हय-गय-रह-जाव पच्चप्पिणणंति तए णं

से कण्हे वासुदेवे जेणेव मज्जणघरे जाव दुरुढे अट्टट्ट मंगलगा जहा कूणिए सेयवरचामरेहिं उद्धुवमाणेहिं-उद्धुवमाणेहिं समुद्विजयपामोक्खेहिं दसहिं दसारेहिं जाव सत्थवाहप्पभिईहिं सद्धिं संपरिवुडे सव्विड्ढीए जाव दुंदहिं-निग्घोसणाइवरणेणं नयरिं मज्झमज्झेणं निग्गच्छइ सेसं जहा कूणिओ जाव पज्जुवासइ तए णं तस्स निसढस्स कुमारस्स उप्पिं पासायवरगयस्सं तं महया जणसहं च जहा जमाली जाव धम्मं सोच्चा निसम्मं वंदइ नमंसइ वंदित्ता नमंसित्ता एवं वयासी-सद्धहामि णं भंते निग्गंथं पावयणं जहा चित्तो जाव सावगधम्मं पडिवज्जइ पडिवज्जित्ता पडिगए तेणं कालेणं तेणं समएणं अरहओ अरिट्ठनेमिस्स अंतेवासी वरदत्ते नामं अणगारे उराले जाव विहरइ तए णं से वरदत्ते अणगारे निसढं कुमारं पासइ पासित्ता जायसइढे जाव पज्जुवासमाणे एवं वयासी अहो णं भंते निसढे कुमारे इट्ठे इट्ठरुवे जाव सोमे सोमरुवे पियंदसणे सुरुवे, निसढेणं भंते कुमारेणं अयमेयारुवा मणुयइड्ढी किण्णा लद्धा किण्णा पत्ता पुच्छा जहा सूरियाभस्स एवं खलु वरदत्ता तेणं कालेणं तेणं समएणं इहेव जंबुदीवे दीवे भारहे वासे रोहीडए नामं नयरे होत्था-रिद्धत्थिमिय-समिद्धे मेहवण्णे उज्जाणे मणिदत्तस्स जक्खस्स जक्खाययणे तत्थ णं रोहीडए नयरे महब्बले नामं राया पउमावई नामं देवी अण्णया मणिदत्तस्स जक्खस्स जक्खाययणे तत्थ णं रोहीडए नयरे महब्बले नामं राया पउमावई नामं देवी अण्णया कयाइ तंसि तारसगंसि सयणिज्जंसि सीहे सुमिणे एवं जम्मणं भाणियव्वं जहा महाबलस्स नवरं-वीरंगओ नामं बत्तीसओ दाओ बत्तीसाए रायवरकण्णगाणं पाणिं जाव उवगिज्जमाणे-उवगिज्जमाणे पाउस-वरिसारत्त-सरय-जाव पव्वंसे छप्पि उऊ जहावि-भवेणं भुंजमाणे-भुंजमाणे कालं गालेमाणे इट्ठे जाव विहरइ तेणं कालेणं तेणं समएणं सिद्धत्थ नाम आयारिया जाइसंपन्ना जहा केसी नवरं बहुस्सुया बहुपरियारा जेणेवे रोहीडए नयरे जेणेव मेहवण्णे उज्जाणे जेणेव मणिदत्तस्स जक्खस्स जक्खाययणे तेणेव उवागया अहापडिरुवं जाव विहरंति परिसा निग्गया तए णं तस्स वीरंगयस्स कुमारस्स उप्पिं पासायवरगयस्स तं महया जणसहं जहा जमाली निग्गओ धम्मं सोच्चा जं नवरं-देवाणुप्पिया अम्मापियरो आपुच्छामि जहा जमाली तहेव निक्खंतो जाव अणगारे जाए जाव गुत्तबंभयारी तए णं से वीरंगए अणगारे सिद्धत्थाणं आयरियाणं अंतिए सामाइयमाइयाइं जाव एक्कारस अंगाइं अहिज्जइ बहूहिं चउत्थ जाव भावेमाणे बहुपडिपुन्नाइं पणयालीसं वासाइं सामण्ण-परियागं पाउणित्ता दोमासियाए संलेहणाए अत्ताणं झूसित्ता सवीसं भत्तसयं अणसणाए छेइत्ता आलोइय-पडिक्कंते समाहिपत्ते कालमासे कालं किच्चा बंभलोए कप्पे मणोरमे विमाणे देवत्ताए उववण्णे तत्थ णं अत्थेगइयाणं देवाणं दससागरोवमाइं ठिई तत्थ णं वीरंगयस्स देवस्स दससागरोवमाइं ठिई से णं वीरंगए देवे ताओ देवलोगाओ आउक्खएणं जाव अनंतरं चयं चइत्ता इहेव बारवईए नयरीए बलदेवस्स रण्णो रेवईए देवीए कुच्छिंसि पुत्तत्ताए उववण्णे तए णं सा रेवई देवी तंसि तारिसगंसि सयणिज्जंसि सुमिणदंसणं जाव उप्पिं पासायवरगए विहरइ तं एवं खलु वरदत्ता निसढेणं कुमारेणं अयमेयारुवा उराला मणुयइड्ढी लद्धा पत्ता अभिसमण्णागया पभू णं भंते निसढेकुमारे देवाणुप्पियाणं अंतिए ० पव्वइत्तए हंता पभू से एवं भंते से एवं भंते वरदत्ते अणगारे जाव भावेमाणे विहरइ तए णं अरहा अरिट्ठनेमी कयाइ बारवईओ नयरीओ जाव बहिया जणवयविहारं विहरइ तए णं से निसढे कुमारे समणोवासए जाए-अभिगयजीवाजीवे जाव विहरइ तए णं से निसढे कुमारे अण्णया कयाइ जेणेव पोसहसाला तेणेव उवागच्छइ उवागच्छित्ता जाव दब्भसंथारोवगए विहरइ तए णं तस्स निसढस्स कुमारस्स पुव्वरत्तावरत्तकालसमयंसि धम्मजागरियं जागरमाणस्स इमेयारुवे - समुप्पज्जित्था-तं धण्णा णं ते गामागार जाव सण्णिवेसा जत्थ णं अरहा अरिट्ठनेमी विहरइ धण्णा णं ते राईसर जाव सत्थवाहप्पभिइओ जे णं अरहं अरिट्ठनेमिं वंदंति जाव पज्जुवासंति तं जइ णं अरहा अरिट्ठनेमी पुव्वाणुपुव्विं चरमाणे गामाणुगामं दूइज्जमाणे नंदनवने विहरेज्जा तो णं अहं अरहं अरिट्ठनेमिं वंदिज्जा जाव पज्जुवासिज्जा तए णं अरहा अरिट्ठनेमी निसढस्स कुमारस्स अयमेयारुवं अज्झत्थियं जाव वियामित्ता अट्टारसहिं समणसहस्सेहिं जाव नंदनवने उज्जाणे समोसढे परिसा निग्गया तए णं निसढेकुमारे इमीसे कहाए लद्धे समाने हट्ठतुट्ठे चाउग्धंटेणं आसरहेणं निग्गए जहा जमाली जावं अम्मापियरो आपुच्छित्ता पव्वइए अणगारे जाए इरियासमिए जाव गुत्तबंभयारी तए णं से निसढे अणगारे अरहओ अरिट्ठनेमिस्स तहारुवाणं थेराणं अंतिए सामाइयमाइयाइं एक्कारस अंगाइं अहिज्जइ अहिज्जित्ता बहूहिं चउत्थं-जाव भावेमाणे बहुपडिपुन्नाइ नव वासाइं सामण्णपरियागं पाउणइ

पाउणित्ता बायालीसं भत्ताइं अणसणाए छेएइ आलोइय-पडिक्कंते समाहिपत्ते आणुपुव्वीए कालगए तए णं से वरदत्ते अणगारे निसढं अणगारं कालगयं जाणित्ता जेणेव अरहा अरिदुनेमी तेणेव उवागच्छइ उवागच्छित्ता जाव एवं वयासी-एवं खलु देवाणुप्पियाणं अंतेवासी निसढे नामं अणगारे पगइभइए जाव विणीए से णं भंते निसढे अणगारे कालमासे कालं किच्चा कहिं गए कहिं उववण्णे, वरदत्ता ० सव्वट्टसिद्धे वीमाणे देवत्ताए उववण्णे तत्थ णं ० निसढस्स देवस्स तेत्तीसं सागरोवमाइं ठिई पन्नत्ता से णं भंते निसढे देवे ताओ देवलोगाओ आउक्खएणं जाव अनंतरं चयं चइत्ता ० इहेव जंबुद्वीवे दीवे महाविदेहे वास उण्णाए नयरे विसुद्धपिइमाइवंसे रायकुले पुत्तत्ताए पच्चायाहिइ से णं उम्मुक्कबालभावे विण्णयपरिणयमेत्ते जोव्वणगणमणुप्पत्ते तहारुवाणं थेराणं अंतिए केवलबोहिं बुज्झिहिइ बुज्झिहित्ता अगाराओ अणगारियं पव्वज्झिहिइ से णं तत्थ अणगारे भविस्सइ-इरियासमिए जाव गुत्तबंभयारी से णं तत्थ बहूहिं ० विचित्तेहिं तवोकम्मेहिं अप्पाणं भावेमाणे बहूइं झूसेत्ता सट्ठिं भत्ताइं अणसणाए छेदेहिइ जस्सट्टाए कीरइ नग्गभावे मुंडभावे अण्हाणए अदंतवणए अच्छत्तए अणोवाहणए फलहसेज्जा कट्टसेज्जा केसलोए बंभचेरवासे परधरवेसे पिंडवओ लद्धावलद्धे उच्चावया गामकंटगा अहियासिज्जंति तमट्ठं आराहेहिति आराहेत्ता चरिमेहिं उस्सासनिस्साहेहिं जाव सव्वदुक्खाणं अंतं काहिइ एवं खलु जंबू समणेणं भगवया महावीरेणं जाव संपत्तेणं निक्खेवओ ० ।१-२। (३०-२)२-१२-अज्झयणाणि ४) एवं सेसावि एक्कारस अज्झयणा नेयव्वा संगहणीअणुसारेणं एवं अहीण मइरित्तं एक्कारससुवि त्ति बेमि ।१। (३०) **𑖦𑖦𑖦 वहिदसाणं समत्तह बारसमं उवंगं समत्तं 𑖦𑖦𑖦**